



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 7

Canada Open: Sen Final-i iogo; Sindhu tsükogo

Ukraine nung rara tenzüker anogo 500 jungogo

VOL. XX NO. 267 (ADOK 267)

DIMAPUR TENTONÜ (MONDAY)

CHITENI (JULY) 10, 2023

₹ 5.00

Karnataka-i NEP anema education policy tasen ka yanglutsü

Bengaluru, July 9, 2023

(Agencies): Karnataka nung Siddaramaiah-i aniba Congress sorkari National Education Policy (NEP) anema education policy tasen ka indang draft adoktsü sentong renemogo.

Centre nung Bharatiya Janata Party (BJP)-i aniba sorkari NEP yanglu.

"Centre sorkari yangluba National Education Policy ya federal system den meputep. Iba nung constitution o democracy den meputep metokmeperi aika lir. India ama tamangba yimsü, oshiober aser sobaliba temeyoktep

aliba linük ka nung Uniform Education System ya meputep. Iba jagi education policy tasen ka yakta yanglutsü" ta Siddaramaiah-i ashi.

Linük nung mezüng atema NEP 2020 mapa tenzükbaji Karnataka nung taoba B.S. Yediyurappa-i aniba BJP sorkar liasü.

"Taoba state sorkari aibelena inyakba ajak metongshitsü. Taoba sorkari text books nung tebilemba kar enoksemogo saka itemji asenok tangatetba anema lir. Taküm küm tsüingda textbooks nungi itemji agientsü" ta Siddaramaiah-i metetdaksü.

Mizoram Secretariat-i nisung 11 shimokba agiener

Aizawl, July 9, 2023

(Agencies): Mizoram nung kaketshir teloktemi Mizoram Legislative Assembly Secretariat nung staff 11 tejak repranga shim ta tai tonglokja lungkak aitba sülen Assembly Secretariat-i mapa nung nisungtem shimba agienogo.

Mizo Zirlai Pawl (MZP) ta ser kaketshir teloki ashiba agi mapa nung shimokba nisung 9 ji Mizoram Legislative Assembly nung Speaker aser Commissioner & Secretary na indang kinungertem lir ta ashir.

Iba ashishitep ken o atema nisungtemi lungkak ait aser tashishitsü melii aser timi mapa nung nisungtem shimoktsü takhangba agüja aru.

July 7 nü MZP-isa Aizawl nung iba onük atema lungkak aitba sentong tulu ka ayongzüka agi.

"Assembly Secretariat nung ketdangsürtem indang kinungertem mapa nung shimokba ajanga tejak repranga shimba ama temulung malemer aser recruitment process timi meinyakba ajiteter" ta MZP

President Lalnunmawia Pautu-i ashi.

Külen, Mizoram Legislative Assembly Speaker Lalrinliana Sailo-i The Mizoram Legislative Assembly Secretariat (Recruitment and Conditions of Service) Rules, 1995 nung lateta aliba ama nisungtem mapa nung shimok ta metetdaksüogo.

Mizo Students' Union (MSU)-i Right to Information (RTI) inquiry benok anungji iba osang mangu tashi teloktemi o mashii mejembii atatsü ayongzüker, ta Speaker Sailo-isa ashi.

Mizoram Legislative Assembly Secretariat nung inyaktü atema shimokertemji Speaker'er jabaso kinungtsü Melissa Lalremruati, Speaker'er jala Vanlalruati Sailo, Speaker'er adianu jala H Rebecca VL Ruatsangi, Commissioner & Secretary'er jabaso Samuel Lalremruata Zote aser Speaker indang medemer tajung K Lalnghakliana'er jala Lalhmangaihuali Khawlhing nung lir.



Lok Sabha aser Rajya Sabha nungi Parliamentary Standing Committee on Energy (2022-2023) züngsemtem den ketdangsürtem Deobarnü Dimapur tonga aruba sülen agiba noksa angur. Parnok Kohima-i tuogo aser asüng Nagaland sorkar den Electricity Amendment Bill 2022 atema senden ka amentsü. (Dimapur, July 9)

Centre-i Manipur tensa tamajungba kümdaktsü: Sachin Pilot

New Delhi, July 9, 2023

(Agencies): BJP-i aniba Centre sorkari Manipur tensa tamajungba kümdaktsü ta Congress lenir Sachin Pilot-i tai tongloksüogo.

Paisa Prime Minister Narendra Modi dang kechiba iba tensa atema 'all-party' senden ka ayonga mamener ta asüngdang.

Manipur Chief Minister N Biren Singh-i state madak ketdangsütsü temeten samaogo ta Sachin-isa ashi.

"Manipur ama state tila ka ya kanga junga anepalutsüla, aria bilemetsüla saka tebilemetsü khuret kecha mabener aser nisung taküm aika samaogo. Sorkari state madak ketdangsütsü temeten samaogo. Iba tensa atema state sorkar,

ruling party (BJP) mesüra Delhi nung alirtem shingaiya tebilemetsü khuret mabener" ta pai metetdaksü.

"Rahul Gandhi-i nübertem den ajuruteptsü atema Manipur-i ao. Iba ya politics tsütsü langka ka ajangzüksü atema masü saka tamangba yimsü aser tanga telemsa balala liaka nisung kari rara anendaktsünür, tejashi agientsünür aser külemi tebilemetsü khuret bennür ta asüba sayutsü atema inyakba mapa ka liasü" ta Sachin Pilot-isa ashi.

Tesüiba ita ana tema nung nisung aika taküm samaogo saka iba atema shingaiya tebilemetsü khuret mabener. Tesüiba nung iba ya matalokdang aser sorkari 'Sabka Saath, Sabka Vikaas'

indang jembir, ta paisa Centre sorkar aija jembir.

"Manipur ya asen linük nung shilem ka masü na? Idakji aliba sensotem timtemer. Tensa tamajungba kümdaktsüba atema shisabulur. Chief Minister (N Biren Singh)-i state madak ketdangsütsü temeten samaogo" ta Sachin-i ashi.

"Akhümsüba aliba Prime Minister-i o ka danga mejembir. Nai (PM) tasoba anogotem aser benjungtem indang tweet asür saka kechiba all-party senden ka mayonger. Kechiba sorkari mapa meinyaker, kechiba anogoshia tashiyim mapa inyakba atema telangzüba kecha mali. Iba atema sasaa bilemer aser tekaratiba nung iba inyakim anentsü imlar" ta paisa metetdaksü.

Aonsotsü ayoker kati pingana anüktsü atema bouncers 2 ayur

Varanasi (UP), July 9, 2023

(Agencies): Uttar Pradesh kübok Varanasi nung aonsotsü ayoker kati pingana alidang jenjang atema raratepba noktangtsü atema bouncers 2 ayur.

India kübok tesem ajungalen pingana jenjang kanga tasak kümogo aser joko takartemi ang alia chitetsüsa tensa ka ajurua lir.

Iba nisung ya Ajay Fauji lir aser pai Lanka tesem nung aonsotsü ayoker. Samajwadi Party

President Akhilesh Yadav indang tasoba anogo nung Fauji-i Varanasi nung cake ka pingana mesüka yanglur rangsa achi.

"Nisungtemi pingana alidang jenjang atema raratepba ni angashio. Kü indang dokan nunga nisungtemi jenjang atema rarateper. Iba jagi ni bouncers ana uniform agir kü dokan nükdaktsür" ta Fauji-i osangbener dang ashi.

Fauji-i pingana seret ka nung

Rs 140-160 agi ayoker aser anepdang 9:00 ako nungi nikongdang 5:00 ako tashi bouncer ana nem nükdaktsür.

Bouncer ana ayuba ajanga nisungtemi jenjang atema kangabo merarateper ta Fauji-isa shisem.

SP president Akhilesh Yadav-ia Fauji aser par bouncers indang noksa ka sayua "BJP-i pingana nem 'Z-Plus' security agütsütsüla" ta lemsatepogo.



Ao Baptist Arogo Mungdang (ABAM)-i ayongzüka 'Candle Light Vigil' ta sür Manipur lima yimjung asoshi sarasadem sentong ka Mokochung town police point nung ayongzüka akaba mapang tangokba noksa nung angur. Iba sentong nung Mokochung town aser temeket yimtsüng nungi arogo balala den mulungtet telok balala nungi nisung meyi dak tema adenshia shilem agia liasü. Sentong nung ABAM executive secretary, Rev. Dr. Prof. Mar Pongener; ABAM women ministry secretary, Alemla Mozür; ABAM literature & education ministry secretary, Dr. Moanungsang Tzüdir; ABAM music ministry co-ordinator, Asenla Longchar; ABAM tir, Rev. Temshi Longkumer aser MTBA Pastor, Rev. Ponen Longchar parnoki shilem balala agia liasü. Mokochung, 9th July, 2023

FCI-Food Storage Depot Mkg nung Fire Evacuation cum Mock Drill agi



Dimapur, Chiteni/July 09 (TYO): Lendong timtem balala ajuruba mapang linük tesem balala nung aliba Food Storage Depots tem kumzuka ayutsü aser linük indang Food Security nung timtem majurudaktsütsü meranga inyakba nung shilem ka ama FCI-Food Storage Depot Mokochung nung Fire Evacuation cum Mock Drill takok ngua agia liasü.

Iba Fire Evacuation cum Mock Drill sentong ya Divisional Office, Food

Corporation of India (FCI) Dimapur ajanga Fire & Emergency Services Department, Govt. of Nagaland den lungjemer ayongzuka liasü.

Iba sentong nung Officer-in-charge of Fire Station Mokochung ajanga FCI Mokochung indang staff, security personnel, Labourers aser truck driver tem nem kitsük-kirong lendong mapang mi remseptsü yimyatem sayua liasü.

Jangotzü yua aliba tesemtem

(godown) nung kitsük-kirong lendong mapang mi nungi jenbutsü asoshi amshiba osettsüset balala renema aliba tendangtsü nükjidong nung iba training ya agia liasü. Kasa mapang kitsük-kirong lendong mesüra ajungbena danga lendong balala ajurudang fire safety equipment tem amshitsü yimya sayutsü mechi iba training ya ayongzük, ta Rongsen T Imsong, Depot Incharge, FCI-FSD Mokochung sangdong ka ajanga ashi.

CM Neiphiu Rio-i asükhu lemsatep

Dimapur, Chiteni/July 09 (TYO): Oking Hospital, Kohima nung L Pukhato Shohe, Nagaland Government registered class-I contractor asüba osang angazüka kanga sasar, ta Nagaland Chief Minister, Neiphiu Rio-i sangdong ka nung ashi.

Pukhato ya Nagaland Government Registered Class-1 Contractors' Union tenzüker rongnung ka lir aser küm aika Union nung tongti zülur ama

inyaka aru. Pa ya temolung agüja aser meranga inyakba nisung ka liasü, shibai mapa tajungtiba nung inyaktsü tangatetba liasü. Ajidang masü pai Tsüngrem kanga meima arogo nunga shilem balala agia liasü, ta sangdong ajanga ashi.

Pa ya ochishir aser dangar kanga meim aser nübur asoshi anibelemba takum ka liasü.

Pa asüba ya Naga nunger aser talisa Sumi kin asoshi takoksa tulu lir. Pa asüba ajanga

tawa adokba süngdaktsütsü tasak asütsü. Pa asen den meliaka asenoki teti pa bilemtetti aser pai mapa tajung inyaka yutsüba asen den teti alitsü ta amanger, ta CM Rio-i ashi.

Mangyimer kibong den ni aser ozü kibongi asükhu lemsatep. Tulusang Tsüngremi parnok nem tasü tait molungsentsü agüjang ta sarasademtsür. Asür tanüla tesunep nung anisüngzükjangma, ta sangdong ajangasa ashi.

2nd NAP Battalion Alichen nung Scientific Bee Keeping training agütsü



2nd NAP Battalion Alichen nung July 8, 2023 nü Scientific bee keeping training agütsüdang tangokba noksa ka yangi angur.

Dimapur, Chiteni/July 09 (TYO): 2nd NAP Battalion nung züngsem aser kibongtem nem Scientific Bee Keeping training agütsüba sentong ka 2nd NAP Battalion Alichen ajanga July 8, 2023 nü ayongzuka liasü.

Iba sentong ya 2nd NAP Battalion indang Unit Family Welfare ajanga Nagaland Bee Keeping and Honey Mission (NBHM) den lungjemer ayongzuka liasü.

Iba sentong nung Vekhosa Chakhesang, Commandant, 2nd NAP Battalion Alichen ajanga

ashiba agi, Unit nung aliba kibong tem senotsü lenmang tali ngutettsü asoshi scientific aser mongintem nungi shisatsü agütsütsü nükjidong nung iba training ya ayongzük.

Iba sentong takok ngua ayongzüktemba atema pai Sentiwapang, Addl. Secy. Agri and Team Leader Nagaland Bee Keeping and Honey Mission dang pelaba lemsatep.

Iba training nung shisalen agütsür ya T. Chuba Longkumer, Para Apiarist; Temjenchuba Kichu, TM, NBHM aser Francis Kikon

TM, NBHM nungertem liasü. Parnoki ninang (longlang) metsüba atema scientific yimya, mojitzü agizükba, anepaluba aser mojitzü agizüker amshiyim indang sayua liasü.

Training agirtem nem ninang metsüba yimya balala aser hadir amshiyim sayua liasü.

Kasa mapang Unit nem teyari oset aser hadir balala agüja liasü.

Iba training tembanga Kaino, Deputy Commandant, 2nd NAP Battalion Alichen ajanga o tatsüka jembia liasü.

Mejangjaba nisung tasümang ka nguteta lir

Dimapur, Chiteni/July 09 (TYO): Station Road, Dimapur nung nisung tasümang ka nguteta lir ta Control Room nungi July 8, 2023 nikongdang 3:40 ako meta osang aruba sülen East Police Station Dimapur nung duty alirtem iba tesem bushia arsanga ao aser yangji arishi küm 20 shi tain tebur (non-local) tasümang ka Nandan Hotel, Station Road, Dimapur nung kimalen ngutet, ta Dimapur Police sangdong ka ajanga ashi.

Iba nisungba ya pant sentsü tanen ka semer liasü.

Iba nisungba ya mejangba ama tejak antüngen shir aser

tetsüing anaprong tepteper liasü. Iba tasümang mita reprang saka tim masüba mapa ajanga asüba mejangjateti lir.

Pa ya yasa-tzüraaba ajanga asü südi ta temolung melemteti lir, ta sangdong ajanga ashi.

Ozüng agi melaba maparen ajak renemba sülen post-mortem examination atema District Hospital Dimapur indang morgue nung yua lir.

Kibur/kinunger/tembar temi Officer-in-Charge, East Police Station, Dimapur den Mobile No. 7085055020 ajanga tongteprateptsü akok, ta sangdong ajangasa ashi.

NPCC ajanga Wokha DCC semdang



Dimapur, Chiteni/July 09 (TYO): Tir S. Supongmeren Jamir-i anir Nagaland Pradesh Congress Committee Team ajanga July 7, 2023 nü Wokha DCC semdanga district nung welfare scheme aser terenlok maparen tang teinyakdak aliba indang Wokha DCC ketdangsurtem den kanga junga jembia senden ka mena liasü.

NPCC ajanga department ajanga dang tang teinyakdak project tem senzuka metoktsüi mapang shidak nung renemtsü

ayongzuka liasü. Social Welfare Department ajanga nüburtem yaritsü asoshi scheme balala yanglua agütsüba asoshi pelaba lemsatep aser Old Age Pensions and Disabilities Schemes mapang shidak nung agütsütsü mepishia liasü.

NPCC aser Wokha DCC ketdangsur temia Deputy Commissioner aser SP Wokha den ajurutepa nübur ajangzüktsü asoshi mapa ajak nung Congress-i yariteptsü renema lir, ta administration dang shia liasü.

CANSSEA ajanga asükhu lemsatep

Dimapur, Chiteni/July 09 (TYO): Confederation of All Nagaland State Services Employees Association (CANSSEA) nung taoba tongti zülur Lanotemsu ajungbena July 8, 2023 nü Meriema nung asüba asoshi asükhu lemsatep, ta CANSSEA sangdong ka ajanga ashi.

Asür Lanotemsu ya nübu tejen ka liasü aser

Lt.Lanotemsu was one of the pioneers who played All

Nagaland Service Association (ANSA) tentetba nung tongti shilem agia liasü. Pa ya shisatsü aser nükla tajung aliba nisung ka liasü aser pa asüba ya CANSSEA asoshi tembar tajung aser tetir ka samaogo, ta sangdong ajanga ashi.

Mangyimer kibong nem Tsüngremi tashi tasen aser tesuneptsüba agütsütsü aser asür tanüla tesunep nung anisüngzüktsü asoshi sarasademtsür, ta CANSSEA sangdong ajangasa ashi.

GPRN/NSCN ajanga asükhu lemsatep

Dimapur, Chiteni/July 09 (TYO): GPRN/NSCN ajanga sangdong ka nung Kilonser Seikhopao Hangsing asükhu lemsatepa liasü, shiba mapang talangka shiranga arur July 9, 2023 nü asü.

Asür Seikhopao Hangsing, S/o Lt. Khupkothang Hangsing, Bongkolong village, Ahthibung, Peren; Kuki Region ya linük tenzüka mapa nung November 1993 nung tenüng zülüoka liasü aser pa tasünü tashi linük tenzüka liasü.

Pa asüba ajanga linük meimba tanüla teyakyak ka samaogo. Pa ya GPRN/NSCN

asoshi rongsen tulu ama liasü, shibai pa mapa nung bendanga agütsür inyakba kisung masü saka dangar dak aria bilemba molungsentsü tajung keta liasü aser Naga lima asoshi tejangraba tulu nung inyak, ta sangdong ajanga ashi.

Pai Naga lima asoshi mapa tajung inyaka yutsüba teti asen molung nung alitsü aser Naga nunger puti otsü nung alitsü.

GPRN/NSCN ajanga mangyimer kibong den asükhu lemsatep aser asür tanüla teti tatem maka tsunep nung anisüngzükjang ta sarasademtsür, ta sangdong ajangasa ashi.

North India nung tzünglu dak sendakba lendong nung nisung 17 asü



July 09, 2023 nü Himachal Pradesh kübok Mandi nung aliba Beas ayong nung tzü mobanga ayimba noksa nung angur.

New Delhi, July 09 (Agencies): North India nung tzünglu maneni aruba ajanga Himachal Pradesh, Uttarkhand, Jammu & Kashmir aser Uttar Pradesh state tem nung tzünglu dak sendakba lendong balala nung nisung 17 süogo.

Himachal Pradesh aser Uttarakhand na nung tzünglu dak sendakba lendong balala nung nisung ter asü aser Uttar Pradesh o Jammu & Kashmir na nunga tzünglu dak sendakba lendong balala nung nisung tenet süogo.

Punjab, Haryana aser Rajasthan state tem nunga tzünglu sashia arudar.

India Meteorological Department (IMD)-i, ano maneni taruba anogo ishika North aser North-West India

nung tzünglu maneni arutsü, ta metetdaksü.

Delhi nungbo tzünglu kanga sashia aruba ajanga school tem shibangdaksüogo.

Amongnü IMD-i, taruba anogo pongunü tashi Western Himalayan region, Punjab, Haryana, Chandigarh, Delhi aser Rajasthan nung tzünglu sashia arutsü, ta metetdaksü.

IMD-isa, "July 10 nungi July 13 anogotem nung Uttar Pradesh tesem aika nung tzünglu kanga sashia arutsü," ta metetdaksü.

Amongnü Himachal nung tzünglu kanga sashia aruba ajanga anentsüh, tzümet süng aser ki chirepba lendong balala nung nisung pongu asü.

Uttarakhand nunga tzünglu sashia aruba ajanga anentsüh lendong balala nung nisung

pongu asü; Uttarakhand kübok Tehri Garhwal district nung temeshi aini aoeer 11 gari nung mener aoba mapang Ganga ayong nung gariji tsükok aser parnok nisung asem asü; Udham Singh Nagar district nunga ki chirepba lendong nung nisung ana asü.

Jammu & Kashmir nunga Poonch district nung Indian Army ana tzümet süng agi ponger oa asü aser Doda district nung anentsüh agi passenger bus ka anembangba lendong nung nisung ana asü.

Uttar Pradesh nunga Amongnü tzünglu kanga arua lendong balala nung nisung asem asü. Kaushambi nung süngdong kongsang ka tsüka arrshi küm ter tetsür chanu ka yiruja asü aser Muzaffarnagar nung tanur ka o tetsü na asü.

West Bengal nung election dak sendakba rara nung asür 20 jungogo

Kolkata, July 09 nung ballot box raksaja liasü (Agencies): West Bengal nung Panchayat election dak sendakba rara nung Amongnü anepdang Malda district nung Trinamool Congress nung inyaker ka tepset, aser ibaji densemabo tang tashi nung election dak sendakba rara nung asürtem 20 jungogo.

TMC nung inyaker, Matiur Rahman vote agütsüi polling station-i aoba mapang nung nisung kari pa longbanger kotari agi tsüngset.

Rahman tepsetba atema TMC-i opposition party Congress nem tai tongloktsüogo.

Kasa tatalokba mapang nungji rara adoka nisung trok yiruba sülen police-i bushisüngdang maparen tenzüko.

West Bengal nung iba election agidang tesem aika

State tesem balala nung party balala tsüngda rara adoka tatalokba balala nung party balala nungi asürtem nisung 20 jungogo.

Ministry of Home Affairs (MHA)-i ashiba agi, Central Armed Police Forces (CAPF) sepaitem lemezüka aliba tesemtem nungbo rara madoki liasü.

Iba election atema State Election Commission (SEC)-i security atema Centre dang CAPF company 825 meshi saka company 649 dang yoka liasü.



July 09, 2023 nü Bhopal nung Union Minister Smriti Irani-i Madhya Pradesh Chief Minister Shivraj Singh Chouhan, par kidang ajuruba noksa nung angur.

Ita 6 tsüngda US nungi India nung nungshi oset 150 bener arutsü

Hampi, July 09 (Agencies): Taruba ita trok tsüngda US nungi India nung nungshi oset 150 shi bener arutsü, ta Amongnü ketdangser kati metetdaksü.

Amongnü Karnataka kübok Hampi nung G20 Culture Working Group senden tembangba sülen Culture Ministry nung Secretary, Govind Mohan-i, India-i züngsem linüktem den 1970 convention atema süoka jembiogo, ta metetdaksü.

"Iba convention nung G20 züngsem linük ajaki melungtepa sign asütsü atema onoki inyaker; ibaji ajanga tajangzük tuluba anguba linükji India asütsü," ta pai metetdaksü.

1970 Convention- 'Means of Prohibiting & Preventing the

Illicit Import, Export and Transfer of Ownership of Cultural Property' ajanga linük ajak dang sobaliba nungshi osettem ozüng alema shibelenba nokdangtsü atema inyaksü ajungshir.

Mohan-isa, "Tawa Ato kilonser (Narendra Modi)-i United States semdangba mapang nung India aser US nati sobaliba nungshi osettem dak sendakba nung tezüngzüktep ka agiogo; yamaji US-i ozüng alema shilelenba bener aruba nungshi osettem ajak meyiptsüsi atema sorkari inyaksü ta shiogo," ta metetdaksü.

"Taruba ita 3-5 tsüngda United States nungi item ama nungshi oset 150 shi meyiapa bener arutsü.

Ibaji (oset 150) India nung nuchiso anguba sülen linüki meyipa bener aruba shilem 50 dak tema asütsü," ta paisa metetdaksü.

US-i meyiptsütsü aliba nungshi oset 150 nungji oset karbo New York nung aliba Metropolitan Museum of Art (Met) nung lir, ta pai ashi.

US-i mezüngbuba shilem nung nungshi oset 15 shi asenok nem meyipa agütsütsü, ta paisa shisem.

3buba G20 linüktem Culture Working Group senden ya Amongnü Karnataka kübok Hampi nung tenzük aser July 12 nung ang tembangtsü.



July 09, 2023 nü Bastar district kübok Jagdalpur nung aluyimertemi tzülu ka nung mo atemdang tangokba noksa nung angur.

Office of the **MOLUNGKIMONG VILLAGE COUNCIL**
Mejensanger Putu Menden
Dist. Mokochung, Nagaland. P.O Tuli 798618

TENÜNGSANG AGÜTSÜR

Nagaland Public Service Commission (NPSC) ajanga agiba Common Educational Services Examination (CESE) 2022 nung Molungkimong senso tajung anati takok ngua konang bener arutsüba asoshi Molungkimong Village Council ajanga tenüngsang agütsür:

- I. Tainjungla Ozukum**, D/o A. Imsu Ozukum & Kumzukla Longchar - Technical Education Department kübok English nung Lecturer.
- Rongsenkala Lemtur**, D/o Imtinungshi Lemtur & Imonenla Imsong - Department of Higher Education kübok Hindi nung Post Graduate Teacher.

Asen teyanglur Tsüngremi nena takum aser wadang ano temaba jenjang nung ajungketa moajang ta sarasademtsür.

Sd/- **(Y. Imsu Tzudir)** Chairman
Sd/- **(I. Chuba Tzudir)** Secretary

Molungkimong Village Council Molungkimong Village Council

AXIS BANK **AXIS Bank Ltd** **Public Notice for – E-Auction of pledged assets being Gold**
A.C.Market, 4th Floor, 1, Shakespeare Sarani, Kolkata- 700071

Talisa sen apurtem aser nüburttem dang tsünglanglen accounts nung aliba hon osettem Axis Bank-i tsünglanglen shia aliba Branch nung public auction asütsü metetdaksür. Tsünglanglen shia aliba sen apurtemi Axis Bank Limited dang sen apua security atema hon osettem agütsü ("Gold Loan Facility"). Demand notices ajanga sen apurtem/Guarantors dang Gold loan facility agiba indang sentsüh agüjang ta metetdaksa liasü.

Sen apurtem/Guarantors-i loan sentsühji magütsütem nungji bank-i sen apurtemi agütsüba hon osettemji, talisa 'schedule of property' nung aliba ama **20-07-2023** (anog) nung nikongdang **12.30 ako nungi 3.30 ako** tashi nung (e-auction asütsü mapang) "Kong aliar yamaji", "Koma lidir yamaji", "Yangji aliba ajak" aser "Ibaji anema meinyaksü" nung ajemdaker e-auction ajanga ayoktsüsa akümer.

Sen apurtem aser sentsüh osang tejangja.

Branch Name	Customer Name	Loan A/c No.	Amount Outstanding	Date of Demand Notice	Gross Weight Grams	Net weight grams
DIMAPUR [NL]	PINKU SUTRADHAR	XXXXXXXXXX7746	257994	6-Aug-22	68.100	65.500
DIMAPUR [NL]	VIKALI WOTSA	XXXXXXXXXX3057	228401	26-Jul-22	49.600	49.500
DIMAPUR [NL]	VIKALI WOTSA	XXXXXXXXXX0790	125878	26-Jul-22	26.000	25.000

Jelia osang magütsüi account melenshütsü/auction anogo melenshütsü atema Axis Bank Ltd. dak tashi lir. Auction ji online ajanga <https://gold.samil.in> (website of online vendor) nung nikongdang **12.30 nungi nikongdang 3.30 ako** tashi nung agütsü (mapang). Telatetbatem osang tejangja website <https://gold.samil.in> (website of online vendor) nung angutsü.

Date: 10.07.2023 Authorized Officer
Place: Kolkata Axis Bank LTD



TIR YIMYIM YIMOBILEM (EDITORIAL)

DIMAPUR TENTONÜ, CHITENI (JULY) 10, 2023

Asenok temeim agi atongtsüla

Tanübo tanga onük ka nungang iba yimobilem nung shisalemsatepnüa bilem saka Manipur nung atalokba lendong timtem indang bilemdang, temulungjang tipmademer aser tanga onük ka bener arua lemsateptsü makoker, kechiyong temulungjang aser tanüla tenük agi Manipur nung pei ki rongdoker talidak makaba purtem aser pei tsürabur aser chirnur taküm ajungbena samadoker mangyim jashi tia nung aliba purtem dang angur. Kasaji, tanga onük ka shisadangtsü merandang ma ta temulungjang-i Manipur lima nung tenla ki ajak rongdoker arem nung aser relief camp nung tekülem agiba purtemang arur. Atangji, tang ama nisung kar atema mapang tamajungtiba tetsübu aser timtem nung aliba mapangji nisung kar asoshibo temeim sayutsü mapang tajungtiba lir. Aji shitak süra, tang Manipur nung tsürabur aser tanurtem meyerijang aika talidak maka kümer tetsübu nung shisabolua aliba mapangji asenok Nagaland nung alirtem asoshibo parnok dang temeim sayutsü mapang tajungtiba asütsü. Kidang-kiyonger asünungji, Manipur nung tesama lendong tulu ajurur jena arurtem aika Dimapur nunga tesem balala nung jenoka lir. Itemji kija kibong, arogo aser lokti balalai rongsen aser sarasadem agi yariba osang angashidang pelaa bilemer. Aji oda, tonga moutetaka Kohima, Dimapur aser Mokochung nung amangba purtemi lokti senden ayonga Manipur lima asoshi sarasademtsüba angudang pelar aser iba jagi Tsüngrem temeim nung Naga nungertem longjemdaksür. Atangji, asenoki yarinüyonga alima rongsen agibo tuluka meyaritetsü, kechiyong asenok kecha maka, sensakertem lir. Ajisüaka, asenok akabaji alima rongsen dang nungi tuluba aser taoba, ibaji Tsüngrem temeim lir. Iba temeimji tang Manipur nung asü-ama aser timtem lendong ajururtem asoshi dang masü saka tenla ki raksatsürtem asoshia kanga nungdaka lir. Manipur nung Khristan-tem tenla ki raksatsürji asenokia tangar tekülemki raksatsütsü ta masü. Tenka ki raksatsürtemjiang temulung meyiper parnoki raksatsüba tenla kiji parnokiang yanglutsüsa Tsüngremi parnok dang taochi sayuang ta sarasademtsüsbajiang Khristan-tem mapa lir. Iba tangatetba nung, Mokochung nunga Ao Baptist Arogo Mungdangi ayonga Mokochung town nung yasung temo milen tsükloka amer Manipur lima asoshi sarasadem mapang agibaji Aor Khristan-temi Tsüngrem temeim sayua inyakba mapa tajung ka asütsü. Naga kintem rongnungbo Ao kin ya nütüsong yongsük nunga, alima rongsen nunga aser tashi temetet nunga teimba, takarba aser tajungba asütsüsa moaja lir. Ajisüaka, Aor ajak longjemer tangar tsübudakja amokmerena senzütsüba masü, mesüra Aor rongsen aser tashitemetet agi tangar akoksadakja inyaktsüba masü saka tangar tetsübu tia nung alirtem nem tasü aittsüsa tashi agütsürtem aser tangar timtemertem nem temeim agi teyari agütsürtemji asenok asütsü tim. Ashiko, tia mejungra Manipur tensa tia ya tamajungba akümtsü aser idangjibo Naga nungertem dena timtem takoksa ajurutsüsa ataloktsüa akok. Iba ama tensa tiaji mataloktsü asüyonga ataloktsü ama bilema Nagaland nung alir asenok Aortemi anir Naga nungger ajak tangatetba nung renema alitsübaji kanga tenügdaktsü kümogo. Kija kibong asüyonga, lokti, yimten aser arogo asüyonga pei tangatetba aser tamang jenjangji tensa junga aliba mapangbo masadangtetter, anungji memeteter. Ajisüaka, tang ama asen daksa mesüaka kidangertem dak timtem lendong atalokdang meteter. Aji oda, tang ya asenok tasü ait mait aser asenok dak Tsüngrem temeim ali asü mali metettsü. Ibai asenok asoshi asen tangatetba, asen tamang aser temeim mapa inyaktsü jangrabatem tendangba aser asadangba mapang ka asütsü. Alima nung tamangba yimsü aika lir saka yimjungbo Yisu dak amanger Khristan purtemi dang yangluteter, kechiyong Khristan purtemji yimjung chir dak nungi jakzükba purtem lir. Iba tashi nung, ano maneni Nagaland nung Khristan-tem longjemer Manipur lima asoshi yimjung mapa inyakba nung takok angutsü imlar. Aji oda, Manipur asoshibo ibai mapang tamajungtiba saka Nagaland asoshibo parnok yaritsü atema mapang tajungtiba lir.

OLEMSABANG TSÜNGREMI NAGA NUNGER KHRISTANTEM TANG ASÜNGDANGER

~ L.Kika Pongener.

(Yashi adok nungi...)

Anungji Yakob-i pa tenung shidakba mashi tashi pa memoatsüba ama, asenoki shidakba ochiba dangi memeyip tashi asen lima tensa tia tajungba dangi marutsü aser temoatsü makatsü. Anungji yimden yimsusurtem, arogo tenzükertem, aser lokti tentet balala nung lenirtem, asenoki ochiba lenmangi meyipdi, aser ochiba yimdong nung lao-a alibaji külemi longjemer mesodi. Aji oda, sura asen lima aser nuburtem yimjung nung sunepa alitsü aser Tsüngremi moatsütsü.

Kechiba nai ni reshikangshir? Saul shiba arogo aser tamangertem reshikangshir tetsüdi ka liasü, pa kenu anogo Damaska atongtsü anasa oya-a alidang, aoksa-a Kotak nungi tesangwa kati pa meketbanga yalok aser pa ali nung ontaka alang, aser ola kati pa dang yamai shia angashi "Saul Saul kechiba nai ni reshikangshir". Aser Saul-i asüngdang "Kibuba na shiba" ??? Aser ola jagi langzü.... "Nai reshikangshiba Yisu ni lir". Saul-ibo Yisu Khrista reshikangshir masü, saka nisung reshikangshir amai bilema inyak, ajisuaka ibaji Yisu khrista reshikangshirba liasü. Tanü asen Naga lima nung anogo shia kechi ataloker...??? Tanü asen lima nung anogo shia azü tokshiba mapatem, rakzükkraktemba mapatem aser ochimashiba mapatem agi sunga lir. Arogo aser yimden, loktiliba aser kibongtem tia reprangdangra kecha nunga tesungjem mali, meputep agi sunger, temeimtep mali, kati ka den tsükchitepa arishiteper, kati ka ajung mereprangnur, tenuk meremtepba agi sunga lir. Tanü nuburtem tia reprangdangra, sen yong nisung taküm tepsettsü mapayur, manger mesangwa nung takar akümtsü arishitepdang ochi mashi mapa inyaktsü arendaka aser aakseta mebilemer, sen yong pei temeden yoka achir, tsüraburi chirnur dang memeimer, chirnuri tsürabur aküm metsübur aser tashi mangar, nutsüng nuburtemi pei madak yimsusur aser lennirtem dang aküm metsür. Tulartemi tilartem züngoka mali mezüngmeshir, yimsusurtemi nuburtem hau ta züngoka mali tenuk amour yimsu asür, Tsüngrem lartemi Tsüngrem metsübui nisung dang tsübuia tenzükter. Joko asen lima Khristan limabo memesuk temenen agi sungadokogo.

Asenoki limapur yimsu-yimpong temenen mapatem toktsür Yisu yimsu osangtajung agizüka amang, saka tema tazütsü tamangertem dang ashi, shitakba tamanger tajung ka ama meliteti asenoki toktsüba temenen dangi tanaben meyipa oa, Yisu Khrista tanaben kangki nung angenlokogo. Ibaji jungjunga shisadangra, asenoki Yisu Khrista reshikangshiba den kecha tepila mali kümogo. Sauli Yisu Khrista magizükdang reshikangshiba ama tanü asen Naga nungger tamangertemi Yisu Khrista reshikangshir. Anungji tanü asen Naga nungger dang Kibuba Tsüngremi asüngdang... "Kechiba nenoki ni reshikangshir"...??? Temeim asen Naga nungger tamanger tajungtem.... Arung asenoki toktsüba temenen dangi meyipa mooli, saka Tsüngrem tejak bushia odi aser asen lima nung yimjung adokdaktsüdi. Asenoki yimden yimsusuba nung nuchiso angutsü bushir, saka idangji asen nubur tsüngda nungbo nuchiso temeden makai küma odagi. Anungji asenok iba jenjang nung ya dang alinungbo India nungger nungi yimden nuchiso nguaka, asen nubur tsüngda nungbo nuchiso makatsü... Tetezü yimjung tesunep malitsü. Asen lima aser nubur tsüngda yimjung melira nuchiso anguba tetezü kecha makatsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tang mezüng tetsür ka United Church of Christ Tir shim



July 03, 2023 nü Indianapolis, Indiana nung UCC General senden nung Rev. Karen Georgia Thompson, United Church of Christ Tir shimba sülen lai lokti den jembidang tangokba noksa nung angur.

July 09, 2023: Protestant denomination tongti- United Church of Christ (UCC)-i vote agütsütepa tang mezüng tetsür ka Tir shimogo; Hombarnü Indianapolis, Indiana nung 34buba UCC General senden aliba mapang nung UCC Tir asütsü atema tetsür ka shim.

Vote 626 ajanga Rev. Karen Georgia Thompson UCC Tir shima liasü, la anema agütsüba vote 43 liasü aser senden nung madener (vote magütsür) tenet liasü.

August 1, 2023 nü lai UCC Tir mapa agizüksü. Lai tesüiba küm 8 tashi Tir inyaksang, Rev. John Dorhauer melenzüksü.

UCC kübok linük nung Arogo 4,700 dak tema lir.

Jamaica nungi Thompson ya tetsürtem rongnungi mezüngbuba UCC Tir asütsü aser Africa nungi UCC Tir tasembuba asütsü.

Vote agütsütepa la shimba sülen lai, "Tanü United Church of Christ nung asenoki otsü tasen ka yangluogo. Iba ya tatembangbuba masütsü. Iba mapang ya ni küm aika mamadoktetsü," ta ashi.

Thompson ya UCC nung tetsürtem rongnung Tir tasembuba asütsü. 1989 küm Rev. Yvonne Delk Tir shima liasü aser 1999 küm Rev. Barbara Brown Zikmund Tir

shima liasü saka vote agüja shimba tetsür mezüngbubajibo la asütsü.

United Church of Christ ya 1957 küm tenteta liasü aser ibaji Evangelical & Reformed Church aser General Council of Congregational Christian Churches densema tenteta liasü.

2019 küm nungi Thompson ya UCC Wider Church Ministries nung associate general minister inyaka liasü, anungji taruba General senden (2025 küm) nung lai azüngtetsüba menden atema

ano nübo tasen ka shimtsü.

Taoba ita sayaba UCC "2022 National Eleven Year Report" ajanga ashiba agi, tang UCC denomination nung züngsem 712,000 lir; 2012 küm nungbo züngsem 998,000 liasü saka tesüiba küm 10 tsüngda züngsem 280,000 shi ajema kümogo.

Kasa report ajanga ashiba agi, 2012 küm hopta shia UCC tekülem sentong nung adener 378,000 aliba nungi 2022 küm nungbo hopta shia tekülem sentong nung adener 225,000 shi dang kümogo.

ANOGO ABEN TSÜNGREM DEN

Tejangja, temulung lemtsü, pukümer T.ken 118:1-9

"Kibuba kü tsütsü lir: ni metsübuttsü: nisungi kü dang kechi inyaktetsü" (t.6). "Tsüngrem asenok asoshi lira asenok anema shiba arutsü?" (Rom 8:31). Alima rangben Tsüngrem asenok tsütsü lir- Tebu, Techir aser Tanela Temeshi. Tetsübu mali shibai asenok anema arutsü, Pa asenok tsütsü lir.

Ibai temulunglemtsü o lir. "Ni metsübuttsü." Ni tesüiba mapa meyipa reprangra Tsüngremi kü mera nüka aliba ni angur. Ni tang mapang reprangra, Pa kü den lir ta ni metet. Ni tarutsü dak reprangra, kü jakdang Pa lir ta ni metet. Pai ni awabanga lir. Pai nangzük, "Ni ne dang kodakang temulung meleme malitsü, mesüra ni na kodakang metoktsütsü" (Ibri 13:5). Ni langzü "Ni metsübuttsü. Nisungi kü dang kechi inyaktet" (t.6).

Tatamsa, ibai tebuakümba o lir. "Nisungi kü dang kechi inyaktet?" O ka nung Tsüngrem tsübuang, meimchir masü. Yisui nütsüngtem dang ya sayu, "Shibai temang tepseter saka tanela tepsettsü makok, pa masü saka shibai temang aser tanela tepseter aser molumii yoktsü akoker, pa tsübuang" (Matt. 10:28).

Kodang nai Tsüngrem tsübudir, tangar tsübuttsü menüngdaker. Tsüngrem tsübuba tetezü, Pa akhümtsübuba aser meimba lir.

Na kechi tia nung lidir liang, Kibuba ne tsütsü lir. Nai tesüiba, tang, aser tarutsü mesüra shibai kechi inyaksü tsübua alitsü menüngdak, kechiaser nai Tsüngrem tsübur. Pa tenangzükba o tem mulunglemtsü lir aser Pa ne pukümer lir.

Calcutta nung St. Thomas Arogoi Manipur atema sarasademtsü

July 09, 2023: Taoba Amongnü nikongdang Kolkata nung aliba St. Thomas Arogo nung Manipur nung yimjung atema sarasademtsüogo; iba sentong ya Catholic Association of Bengal-i ayongzüka liasü.

Imphal nung tongti putir, Rev. Dominic Lumon-i, "May 3, 2023 nungi tenzüka Manipur nung tensa mesüngjemeteter. Nisung meyirjang aikati pei ki toktsür jenshiba, camps nung jenoka aliba, teyarir maliba aser tarutsü atema teimla maliba ngua temelung raksar," ta metetdakja liasü.

Ajioda Imphal nung tongti putiri ayongzükba ama Catholic

Association of Bengal-i Arogo nung Manipur nung yimjung atema sarasadem sentong ayongzüka agi.

"Sorkar aser ozüng benokba agency temi akokba tashi rara nokdangtsü meranger. Nisung tajungertemi camp nung jenoka alirtem semdanga teyari balala agütsür. Telok balalai rara anentsü aser yimjung alitsü atema sarasademtsüdar," ta Rev. Dominic-i metetdakja liasü.

"Manipur nung nüburtem den tejashi lemsatepba den külemi nüburtem atema sarasademtsütsü asoshi lokti tekülem sentong agitsü aser Mother Teresa kürakyanglu

tashi candlelight procession agitsü osang angashia pelar," ta paisa metetdakja liasü.

Amongnü nikongdang ghonda ka shi sarasademtsüba sülen Tenla kidang nungi Allen Park nung aliba Mother Teresa indang kürakyanglu tashi candlelight procession agia liasü.

St. Thomas Arogo Tenla kidang dean, Moley D' Costa leniba nung tekülem sentong agia liasü.

Tesülen osangbener den jembidang D'Costa-i "Onok ajaki yimjung atema sarasademtsüogo. Temelungjang nung yimjung alitsü, kibongtem nung yimjung

alitsü, loktiliba nung yimjung alitsü, state nung yimjung alitsü, linük nung yimjung alitsü aser alima nung yimjung alitsü atema onoki sarasadem. Manipur nung yimjung mali, anungji state nung yimjung alitsü atema onoki sarasademtsüogo," ta metetdaktsü.

Catholic Association of Bengal Tir, Angelina Mantosh Jasnani-i, "Onoki kin ka atema dang sarasademtsüba masü saka Manipur nung yimjung alitsü atema sarasademtsüogo. Onoki Manipur nung putirtem den tongtepratepdar aser yangji nüburtem timtemba osang angashia temelung raksar," ta metetdaktsü.

Impur nung ABAM Zone II - Lanujen Waden sentong takok ngua agiogo



Impur, July 09, 2023 (TYO): ABAM Literature & Education Children Ministry ajanga ayongba Lanujen Waden anabuba ABAM Zone II asoshi July 7-9, 2023 anogotem nung kanga takok ngua agiogo, ta ABAM Executive Secretary,

Rev. Dr. Mar Pongener-i sangdong ka ajanga metetdaktsü.

Iba sentong "Kümdangti" Kolosi 2:8 nung ajemdaker agiogo. Iba sentong nung jangratemsü kaji, Extravaganza mapang nung

Laishiba nungi tongtibang otsütem aser ABAM dak sendakba otsütem jilushi aiba liasü.

Nisung aikati memetetba otsütem saya balala ajanga sayubaji ajak asoshi kanga tangazükba tulu anguba mapang

liasü, ta sangdong nung shia lir.

Iba sentong nung tongti O jembirtemji Rev. Dr. Prof. Mar Pongener, Executive Secretary, ABAM, Mr. Butesen Ozüküm, Research Student of Media & Education MLCU, Shillong aser Mrs. Abenla Aier Child

Coordinator, ABAM liasü.

Ajak agi Arogo 19 nungi tesayurtem 78 anir tanurtem 383 arua iba sentong nung denogo; maneni iba sentong agia aotsü alinung ajaki sarasadem nung yaridaktsüner, ta kasa sangdong ajanga mepishia metetdaktsü.

AO OSHI ANGAZÜKDAK: TANÜ ANGAZÜKTSÜBA OJANG



Renlok

(v) timba aser tuluba aküm (increase)

* Muslim nung nütüng kanga **renloker**.

Renrajeb

(n) süng mesüra au nungi okzüka tejob (tinder)

* Akhi mapangbo mi aputetsü atema **renrajeb** amshi.

OLONG PAITEP # 6571

15x15 crossword grid with numbers 1-17 indicating starting positions for words.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong talemangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6570 TELANGZÜBA

TIPIEN :

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.



SANGREMER ALOKBAR KIDANGSER TASEN, AMITSÜR ROSELA ARUA ALIR :

Rosela : Oko, ni ya office mapa tali den ang kidang merük-meju, shitok-shira inyakdang mapanga mangurji, taonungbo kecha mapa mali amai chia jema relax süa, enjoyment nung mapang endoknera ya, na a azüngtsüama?

Alokba : Aya kodaser mazüngtsüba, azünga lirko.

Rosela : Good, süra taonungbo nai kü azü Brownie o Blackie na ya repranga atang no?

Alokba : Ok ok!

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Assam sorkari school 40,970 nem Rs 96.21 crore grants agütsü



Guwahati, July 9, 2023 (Agencies): Assam state sorkari Lower Primary (LP) aser Upper Primary (UP) schools 40,970 nem School Grants Rs 96.21 crore agütsüogo ta Education Minister Ranaj Pegu-i ashi.

School 11480 nungi tesayurtemi Siksha Setu portal nung parnok staff profiles magütsüba ajanga grants sota lir. Parnoki update asüba sülen grants agütsütsü, ta pai metetdaksü. Assam nung government

aser provincialized schools nung teaching aser non-teaching staff 2,42,114 nungi parnok 2,08,531-i Siksha Setu nung profile update süogo, ta Pegu-isa ashi.

"Government aser provincialized schools 45983 nung teaching aser non-teaching staff 2,42,114 lir. Iba nungi parnok 2,08,531-i Siksha Setu nung profile update süogo. Staff 33583 (Elementary 26117 aser Secondary Schools 7466)-i ano update masü lir anungji parnok dang tekaraba nung update asütsü mepishir" ta Assam Education Minister-isa metetdaksü.

KSU-i Khliehriat tashi railway line yanglutsüba magizüker

Shillong, July 9, 2023 (Agencies): Sorkari Meghalaya kübok Khliehriat tashi railway line yanglutsü sentong magizüker kechiyong iba ajanga ozüng alema nisungtem arutsü ta Khasi Students' Union East Jaintia Hills District unit-i metetdaksüogo.

Union-i East Jaintia Hills nung Deputy Commissioner den ajurutepa parnok tebilemstütem lemsatop.

Tanga state tem nungi aser Bangladesh dena kidanger linüktem nungi aruba nisungtem aziöktsü atema ozüng tesashi yanglutsüta ta parnoki DC dang ashi.

railways mapa meinyaktsüla. Onoki 1998 nungi sorkari iba mapa inyaknüba anema noktaka arur aser teinyaktsü tasen kar meinyak tashi noktangtsü" ta Khasi Students' Union-isa metetdaksü.

Taoba mapang Khasi Students' Union-i Tetelia nungi Byrnihat railway project magizük aser iba jagi 2016 küm iba maparen anena liasü.

Bendangertem aruaka Meghalaya nung lisopurtem indang temeten kümzüka ayutsüla ta parnoki ashi.

Parnokisa sorkar dang railway maparen aritepa meinyaki tamasa gari lenmang tajung yanglutsü, healthcare & education tajungba kümdaktsütsü aser tanga essential services atema inyakang ta metetdaksüogo.

KSU-isa Jaintia Hills Autonomous District Council (JHADC) nung Chief Executive Member (CEM) Thombor Shiwat den ajurutepa North East Frontier Railway (NFR) nem No Objection Certificate (NOC) magütsütsü ayongzüksü sentong lir.

East Jaintia Hills indang district headquarters Khliehriat tashi railway line yanglutsü bushitepogo ta Chief Minister Conrad Sangma-i metetdakja liasü.

"Nübo agi tangar memenepertem kümzüka ayutsü atema ozüngtem meyangu tashi

Ajisüaka, Khasi Students'

Manipur nung aluyimer nem security agütsütsü

Imphal, July 9, 2023 (Agencies): Manipur state sorkari VIPs, MLAs aser ministers indang security ajemogo aser item police-i aluyimertem anüktsü.

State sorkari aluyimba maparen maneni inyaktsü atema mapa kar inyaker aser police-i parnok anüktsü. Ajisüaka, aluyimertem tamasa pei pei district nung superintendent of police den tongtepratepsüla ta metetdaksüogo.

i ashi. ta IK Muivah-i tetuyuba agütsü.

"Aluyimer tem i aluyimertem atema VIPs, MLAs aser ministers indang security ajemogo" ta Police Headquarters, IG Manipur Police, IK Muivah-

Aluyimer shinga security cover medeni alui maotsüla

Alu ayimba tesem balala nung security atema nübo lezmüktsüogo. Parnokji Imphal West nung sepai 822, Imphal East nung 290, Bishnupur nung 236, Thoubal nung 147, Kakching nung 204, Kangpokpi nung 200 aser Churachandpur nung 300 lir ta paisa metetdaksü.



Tripura horticulture department director PB Jamatia-i Chittagong nung India Assistant High Commission ketdangsürtem nem jiru agütsüba noksa nung angur. Tripura chief minister Dr Manik Saha-i Bangladesh Prime Minister Sheikh Hasina dangi jiru seret 1000 jungnüa bener yok. Dhaka nung aliba Indian high commission ketdangsürtemi Tripura nung tsüntetba jiruji Bangladesh Prime Minister's Office nem agütsütsü. June 15 nü Bangladesh Prime Minister Sheikh Hasina-ia Tripura chief minister Dr Manik Saha nem teti seret 500 bener yoka liasü. (Agartala, July 9)

Office of the
DIMAPUR WATSÜ TELONGJEM
Dimapur - 797112 : Nagaland

DIMAPUR WATSU TELONGJEM AJANGA METETDAKTSUR

Item tekubok agüja aliba Amitsürtem (Destitute Women) nenok teyari agitsü asoshi Dimapur Watsü Telongjem Kimen Wt.N.Sashila Mopungchuket Lengrijan (near DABA Sümedem Fellowship)

12th July 2023 Anepdang 9 am shidak nung arutsü mepishir. Tangar ajak agizüker nenok ishika dang adar asünung agüja aliba anogo mesüitsü metetdaksür. item nungdakba documents bener arutsü metetdaksür. Bank Ac Passbook & Aadhar card Xerox .

SN	N/ of Beneficiary	F/N	H/Name	Add
1.	Mapuienla	Lt.Sünepba	Lt.Chuba	Ao kashiram
2.	Imkongjungla	Lt.Nungdoktoshi	Lt.Toshi	Nahabari
3.	Temjenpongla	Lt.Tsüngikaba	Lt.Limayanger	Nahabari
4.	Inyaktola	Lt.Chubanokden	Lt.Tinuchuba	Diphupar
5.	Wapangla Aier	Lt.Bendang	Lt.Tiaba	Nahabari
6.	Tsüktilemla	Lt.Imkongsowa	Lt.Rongsen	Nahabari
7.	T.Amongla	Lt.Imkongliba	Lt.Yapang	Sugar Mill
8.	Atule Longchar	Yarba	Verapan	Sugar Mill
9.	Amongla A		Lt. Wati Ao	Dimapur
10.	Temjennungla Ao	Rolland Ao	Unmarried	Padumphukeri
11.	Imtula	Lt.Waitsüngba	Lt.Sennükshiba	Aoyimti village
12.	Tamongla	Lt.Wapang	Lt.Kilentemsü	Oriental colony
13.	Nüngshiyangla Imchen	Onendangba	Unmarried	Dubagaon H/N 120

Sd/-
(Wt. Aoinla Jamir)
President, DWT
Ph. No : 9856171163

Sd/-
(Wt. Wangshikokla)
Jt. Secretary, DWT
Ph. No : 8258840867

Ukraine nung rara tenzüker anogo 500 jungogo

Kyiv, Chiteni/July 09

(Agencies): Ukraine nung rara tenzüker Honibarnü anogo 500 ajungba nungtem nung Ukraine Tir Volodymyr Zelenskyy-i Black Sea nung aliba asetkong ka nungi linük sepaitem tenüng sanga jembiba video ka prokshi, aser iba asetkong ya Russia nungeri amakba Ukraine-i nokdangba indang temaitsü ka akum.

Snake Island nungi jembidang Zelenskyy-i iba asetkong asoshi raraba Ukraine sepaitem aser linük nung danga 'defenders' ajunga nem tenüngsang agütsü aser iba asetkong tanaben agitetba ya Ukraine-i pei litsü ajak tanaben agitsü asoshi kuli tajung ka lir ta ashi.

"Yangi takok anguba tesem nungi ni asen sepai ajak dang item anogo 500 asoshi pelaba lemsatepner. Ukraine asoshi rarar ajak dang kanga pelar!" ta Zelenskyy-i ashi.

Video ya kodang yangluar mejangja. Zelenskyy ya Turkey nungi Honibarnü meyipa shilang.

Azovstal steel plant kumzüka ayutsü mechi raraba sepai tanishir pongu tayimtsü nung pa den külemi meyipa shilanger, ta pai sangdonga liasü. Rara tetenzüklen Russia-i iba yimti agitsü asoshi ita aika rara liasü.

Russian sepaitemi rong anendak Mariupol yimti agidang par anema kanga sashia nokdakba tesemtem rongnung iba steelworks ya tatemsaba liasü. Iba plant indang longpok aser corridors nung tensa tia tamajung liaka parnoki tasü ita raraba atema Ukraine nunger temi kanga jangja meteta akum.

Azovstal kumzüka ayutsü mechi rarar nisung 2,000 dak tema 2022 küm May ita tiyonglen iba tesem yutsür ao aser Russia nungeri pua ayu. Lenir pongu rongnung karbo Azov national guard regiment nungi liasü, koba Russia-i neo-Nazi ta ajar, aser September ita tepuokdak alir melentepba mapang chioka liasü aser Turkey-i anir ao.

Tepuokdak alirtem melentepba tezüngzüktep kübok item lenirtem ya rara matem tashi Turkey nung tir-i kumzüka ayutsü liasü. Parnok Ukraine-i meyipa yokba indang Ankara mesüra Kyiv ketdangsur temi rasaa mashi.

"Azovites lenirtem Turkey nungi Ukraine-i meyipa aoba ya tang aliba agreement tem nung aibelenba dang lir. Talisa iba ya ajanga tezüngzüktep nung Ukraine aser Turkey, linük anaprongi aibelener," ta Kremlin odongtar Dmitry Peskov-i ashi.

Honibarnüa linük east aser south tsütsü kanga sashia khatapa liasü, kechiaser Ukraine sepaitemi Russian defence tabu balala alidak amaker.

Honibarnep Russia nunger rocket ka Lyman jila nung khaloktsü aser iba mapang civilian ti asü aser 13 yiru, ta Ukraine indang interior ministry ajanga ashi. Anüdoklen Donetsk region indang governor Pavlo Korylenko-i noksa kar prokshiba nung nisung tasü mang kar liasü aser Russian kiralongrar temi maneni Donetsk nung civilian amaker, ta ashi.

Lyman ya front line nungi kilometre ishika dang lir, kong

Russian sepaitemi tawa Kreminna arem min nung asendenshir rarar.

Ukraine sepaitem tashi taitba kumdaksütsü mechi teyari tali agütsütsü asoshi NATO lenirtem taruba hopta Vilnius nung ananü senden amentsü lia US-i Ukraine nem cluster bomb agütsütsü sangdong, aser iba telemetba ya kanga saka agi, ta Tir Joe Biden-i ashi. NATO züngsem shilem asem nungi shilem anati iba bomb ya nokdanga lir, kechiaser iba bomb yagi civilian aika asüba otsü lir, saka US-i iba bomb agütsüba ajanga Ukraine-i Russia den raraba nung yaritsü ta ashir.

US-i iba mera agiba Ukrainian Defense Minister Oleksii Reznikov-i tenüngsang agütsü aser cluster bomb agütsüba ajanga linük tanaben agitetsü aser Ukraine sepaitem takum kumzüksü, ta ashi.

Cluster bomb ya ozü litsü tanaben agiba nung dang amshitsü aser Russia litsü nung makhaloktsütsü, ta Reznikov-i nangzük. Civilian tem meyrutsütsü mechi iba bomb ya jila nung mamshitsü, ta pai ashi.

UK, Canada, New Zealand aser Spain linük temi iba bomb amshitsü memolunger ta shiogo. Linük 100 dak tema nung iba bomb ya nokdanga lir, kechiaser iba bomb yagi civilian nem lendong agütsür.

Iba cluster bomb ya ajanga bomblets tila aika yoker aser tesem tulu nung nisung tepseter.

Iba bomblets tila mapang shidak nung mapokba ajanga mangatetep adoka lir. Mapok aliba bomblets ya ali nung mapang talanglang alir aser mashi mapang apoker.

OFFICE OF THE
DIMAPUR KANGTSUNG SENSO TELONGJEM
Dimapur - 797112 : Nagaland

KONANG TETUSHI AGÜTSÜR



Shri. R. ATUBA JAMIR
Dy. GM, NST



Shri. PURTEMJEN
Registrar, Dirt. of Geology & Mining

Dimapur Kangtsung Senso Telongjem (DKST) züngsem tajung Wb. R. ATUBA JAMIR, S/o. Lt. Yimyangberba and Wb. PURTEMJEN, S/o. Lt. T. Bendang, sorkar mapa tenzüka nung nendaka, meranga aser bendanga agüja inyakba ajanga Deputy General Manager, NST, Govt. of Nagaland, Dimapur and Registrar, Directorate of Geology & Mining, Govt. of Nagaland, Dimapur menden temaba jenjang (Promotion) ngutetba asoshi DKST sanger ajaki konang tetushi tulu agütsür. Tajung Tsüngremi nenok mapa tasen nung anema aliba den temoatsü tulu nung len aniangma ta sarasademtsür.

Sd/-
(R. Atuba Jamir)
President, DKST

Sd/-
(Alem Pongener)
Secretary, DKST

TENUNGSANG TETUSHI AGÜTSÜR



Dr. TEMJENOKCHA .B. LONGCHAR

REMDONGSHILU Semchir (Khensa) nungi Lt. BENDANGWAPANG LONGCHAR aser Mrs. LONGRIKOKLA KICHU tena jabaso Dr. TEMJENOKCHA .B. LONGCHAR Semchir rongnungi mezüngbuba P.H.D Degree jenjang ajangzüktetba tepela konang tetushi agütsür.

Tarutsü anogotem nung ne wadang ajak Tsüngremi moajang ta Sarasademtsür.

REMDONGSHILU Semchir.

Office of the
Ao Temolung
SÜNGRATSÜ OZÜKÜM TSÜR TELONGJEM
HQ. Süngratsü P.O Impur

TENÜNGSANG AGÜTSÜR

1. Wb. Yimkum I. Ozk (S/o Mr & Mrs. Imtilepzük Ozk), pai UPSC tatidang nung IAS menden ngutet.
2. Kr. Imtijungla Ozk (D/o Mrs & Rev. Dr. Supotemjen Ozk), lai M. Sc. Gynaecology, MNR College Hyderabad nungi Top 13 jenjang ngutet.

Ano shirnokisa tatidang balala nung takok tajung ngua asen llang kidong nem konang nüngsang bener arutsüogo, nenok ajak dang asen asen llangtsür-i pelaba lemsateper.

Nenok taküm nung temoatsü aser arishi lidakjang ta asen llangtsür sarasadem.

Sd/-
Tamaienla Ozüküm
President

Sd/-
Tongpangkoka Ozüküm
G/Secretary

Office of the
Mongsenyimti Aier Kidong

TENÜNGSANG AGÜTSÜR

Kr. Imsuzungla A. Aier D/o Wb. Akangyanger Aier, NPSC ajanga Asst. Prof. in Anthropology under H. Edu. nung takok tajung ngutetba atema tenüngsang agütsür.

Tsüngremi tarutsü nunga la wadang aser taküm temoatsü nung len aniangma ta onok sarasadem.

Sd/-
Wb. Lipokyatet Aier
Tir

Sd/-
Wb. Meyisunep Aier
Tezülur

LAND FOR SALE

NAGA UNITED VILLAGE
Near Daily Bazar
Dry Land - Price - Rs. 380/- per Sq.ft.
Contact - 9612448446 / 8798119488

Naga tsür trok World Sepaktakraw Championship nung asayatsü



Tabelen nungi; Sezovelu Dozo, Rukuvinu Tsukru, Menenu Tsukru, Seyiekhrieno Tapa, Jwensinle Kesen, Akumtila Ao nunger tangokba noksa nung angur.

Dimapur, Chiteni/July 9 (TYO): Naga tsür trok World Sepaktakraw Championship nung asayatsü. 36buba Kings Cup ya Thailand kübok Nakhon Ratchasima Province nung July 8 nungi 16 tashi asayatsü.

Par trok ya chief coach Hemraj kübok India team nung asayaba angutsü.

Kings cup Sepaktakraw

world Championship ya Sepaktakraw team event ka lir koba iba asaya atema ajak dang nungi kanga dang tongtibangtiba asayamung ka lir, kechiyong temaba jenjang nung asayaba National team tem timba iba asayamung nung shilem agitsü lir.

King's Cup ya Thailand chuba nem bendanga agütsüba

asayamung ka lir.

Ministry of Youth Affairs and Sports and Sports Authority of India-i, iba asayamung tembangba sülen 19buba Asian Games atema renemshitsü asoshi Takraw Foundation of Thailand, Bangkok nung July 17 nungi August 30 nü tashi training agitsü atema temelaba agütsüogo.

MDTA-i ayongzüka Taekwondo asayamung asayatsü

Mokokchung, Chiteni/July 9 (TYO): Mokokchung District Taekwondo Association (MDTA)-i ayongzüka July 15 nü Ladybird School, Mokokchung nung district level Under-14 Taekwondo Tournament ka asayatsü.

Iba asayamung ya Catch Them Young inyakyim kübok Department of YR&S Annual Calendar nung aliba inyakyim nung shilem ka lir.

Iba asayamung ya tetsür aser tebur naprongla atema asütsü. Asayamung nung takok

angurtem nem senpet aser kulikaket agütsütsü.

Asayamung nung asayatsü aliba jenjang balala yamai alitsü:

Boys

- a) 27 kg
- b) 27-32 kg
- c) 32-42 kg
- d) 37-42 kg
- e) 42 - 47 kg
- f) 47 - 52 kg

Girls

- a) 28 kg
- b) 28-33 kg
- c) 33-38 kg
- d) 38-43 kg

Kasa mapang asayamung nung MDTA-i July 20 aser 21 nü IG Stadium nung asayatsü aliba State Level Under-14 Taekwondo Tournament atema asayartem shimtsü.

Iba dak sendakba nung Association-i tsürapurtem aser school balala dang pei chirnur aser kaketshirtem (taekwondo asayartem) iba asayamung nung shilem agitsü atema ajungshitsü mepeshia metetdaksüogo, kechiyong iba ajanga parnok nem lenmang balala lapoktsütsü.

Asayamung dak sendakba nung osang tejangjaba agitsü atema item number; 8787535824 aser 7085622151 ajanga MDTA den t o n g t e p r a t e p t s ü metetdaksüogo.

West Indies team nung Mckenzie, Athanaze na aniokogo

Chiteni/July 8, 2023 (Agencies): July 12 nü India den mezüngbuba Test asayatsü atema West Indies-i team nung tang mezüngbuba left-hander Kirn Mckenzie aser Alick Athanaze na ansemogo aser all-rounder Rahkeem Cornwall-a team nung tanaben aniokogo.

Asayar shimertemi mezüngbuba Test asaya atema asayar 13 den reserves asayar ana shimba sangdongogo.

McKenzie aser Athanaze na West Indies team nungi ODI nungbo asayatokogo, ajisüka tang mezüngbuba Test asayatsü lir.

Kasa mapang nung Cornwall shiba 2021 kum November ita mezüngbuba Test asaya liasü, pa den left-arm spinner Jomel Warrican-a team nung aniokogo. Warrican ya Zimbabwe nung oa asayaba team nung densema liasü ajisüka February ita South

Africa den asayaba mapangbo masayatet. Pai tang tashi nung Test 13 asayar lir.

Left-arm spinner Gudakesh Motie yirur aliba ajanga masayatetsüsa aküm.

"A' Team-i tawa Bangladesh semdangba mapang McKenzie aser Athanaze nati kanga junga asayaogo. Lanur asayar ana yagi run aika yangluogo aser tejen asayar ama asayatetogo aser iba maongka agütsütsü dalang ta onoki bilemer," ta lead selector Desmond Haynes-i ashi.

"Motie yiruba ajanga pa meshimtettsüsa kumogo aser iba ajanga spin bowling department nung Warrican aser Cornwall na nem maongka agütsüogo. Tenaprongla taoba aser tenati koda asayatsü aji meteta lir.

"Onoki Kyle Mayers-a

asadangogo, ajisüka pa tangbo anogo pongu atonga asayatsüsa jenjang ka nung mali," ta paisa shisem. Iba asayamung ya India aser West Indies naprongla atema WTC cycle tasen ka tenzüksüba asütsü.

West Indies team Coolidge Cricket Ground, Antigua nung pre-series camp agiba sülen Deobarnü Dominica-i aotsü. Parnok Hombar nikongtsütsü aser Mongolbar anepdang training agitsü.

Team nung asayartem yamai alitsü: Kraigg Brathwaite (Captain), Jermaine Blackwood (Vice Captain), Alick Athanaze, Tagerarine Chanderpaul, Rahkeem Cornwall, Joshua Da Silva, Shannon Gabriel, Jason Holder, Alzarri Joseph, Kirk McKenzie, Raymon Reifer, Kemar Roach, Jomel Warrican Traveling Reserves: Tevin Imlach, Akeem Jordan.

Inter-school athletic meet July 20 nungi asayatsü

Kohima, Chiteni/July 9 (TYO): Inter-school Athletic meet July 20 aser 21 nü Indira Gandhi Stadium Kohima nung asayatsü. Iba asayamung ya U-14 aser U-18 ta category ana kuma lemsar track and field asaya balala asayatsü.

District Sports Officer aser Kohima District Athletics Association (KDAA) den longjemer "Beti Bachao Beti Padhao" program kübok Kohima District Administration-i iba asayamung ya ayongzüka asayatsü.

Iba dak sendakba nung ketdangsurtem orientation sentong ka Children Christian School, Mission Road nung Hokolbarnü agiogo, kong Neilazetuo Khezhe shisalen sayur liasü.

Asayamung nung shilem agitsü jangraba high school aser higher secondary school tem dang form tem District Sports Officer (IG Road, Opp SCERT Office) office aser District Education office (Below Secretariat office) nungi agizüksü metetdaksüogo.

Canada Open: Sen Final-i iogo; Sindhu tsükogo



Lakshya Sen

Chiteni/July 9, 2023 (Agencies): Commonwealth Games champion India nung Lakshya Sen-i Canada Open Super 500 asayamung semifinal nung Japan nung asayar Kenta Nishimoro straight sets nung koka final-i iogo.

Almora nung soa ainba asayar yagi kum ka dak tema nung tang mezüngbuba BWF asayamung ka final tongtetogo. Semifinal nung pai Japan nung asayar ya 21-17, 21-14 agi koka liasü.

Sen-i mezüngbuba set nung asaya meyilongi tenzüker aser point pezü agi tejakdang aliba maongka magitet, ajisüka kanga atasa asayaba sülen point 8-8 ta kasasa aküm.

Mezüngbuba game nung break tashi nung point 11-10 ta Nishimoro point ka agi tejakdang liasü, ajisüka break sülen Sen-i kanga junga asaya tenzüker aser pai asayanüba ama kanga junga asayateta mezüngbuba game 21-17 agi akok.

Tanabuba game nung asayar anapronglai kasasa junga asaya aser point 9-9 liasü. Ajisüka iba sülen India nung asayar yagi asaya amokbanger asaya-a pa 19-11 agi tejakdang aküm aser asaya 21-14 agi koka liasü.

Sen tang agi tanabenbuba

Super 500 asayamung ka final tongtetogo.

2022 kum August ita pa teni nung surgery ka agiba sülen junga masayateti arur tang iba asayamung nung final tongtetogo.

2021 World Championships bronze medalist ya final nung China nung asayar Li Shi Feng den asayatsü.

Sen ya taoba mapang world number 6 liasü saka tang 19bubai asepsüka lur lir.

Sen tatemsa final asaya ya 2022 kum Commonwealth Games nung asaya liasü koba pai kokogo.

Li Shi Feng aser Sen na tsüngda tang tashi nung trokben asayar lir aser Sen-i asaya 4 aser Feng-i 2 koker lir. Tena Thailand Open nunga asayaogo aser Sen-i arishi kum 23 tain China nung asayar madak takok ngua liasü.

Ajisüka India tsürtem rongnungi PV Sindhu semifinal asaya nung Japan tsür world no. 1 asayar Akane Yamaguchi-i tsükdaksüogo.

Yamaguchi-i iba asaya ya 14-21, 15-21 agi ayong ayonga koka liasü. Sindhu taküm junga masayateti aruru iba asayamung nungbo semifinal tonga asayatetogo, kechiyong la taoba asayamungtem nungbo kanga kara tsükatoka liasü.

BILEMDANGANG

"Tetoktepa balala nung shilem agir melira takoker koda bendangtsü."